



**I. ATALA**  
**BIZKAIKO LURRALDE HISTORIKOKO FORU ADMINISTRAZIOA**  
**Bizkaiko Foru Aldundia**

**Ekonomia Sustatzeko Saila**

**Bizkaiko Foru Aldundiaren 122/2021 FORU DEKRETUA, abuztuaren 24koa.**  
**Honen bidez, Teknologia Transferentzia 2021 dirulaguntzen programa arau-**  
**zen duten oinarriak eta deialdia onesten dira.**

I

Ekonomia Sustatzeko Sailak 2020-2023 epealdirako dituen ardatz estrategikoen artean, Bizkaia lurralde berritzaile eta lehiakor bihurtzea dago, enpresen sare sendoagatik nazioartean aintzatetsia, industrian zein zerbitzu aurreratueta presentzia handikoa, eta enplegu egonkorak eta kalitatekoak sortu eta mantentzeko eta oparotasun inklusiboari eusteko gai dena. Ardatz horren barruan, Bizkaiko zentro zientifiko eta teknologikoei laguntzeko xedea dago, enpresei enpresa-arloko erronkei aurre egin eta nazioartean duten posizionamendua hobetzeko aukera emango dien transferentzia teknologikoa bizkortzeko.

Eustaten azken datuen arabera, 2019. urtean Euskadin ikerketa eta garapenean (I+G) egindako gastua Euskadiren barne-produktu gordinaren %1,89 izan zen. Bizkaian, tasa txikixeagoa izan zen, %1,71. Datuon arabera, Euskadi eta Bizkaia oraindik ez dira heltzen 27 herrialdeen Europaren batez bestekora, zeina %2,19 baita, eta nahiko urrun daude herrialde aurreratuenetatik. Baina, estatu mailan, Euskadi oraindik ere I+G-n gehien inbertitzen duen autonomia-erkidegoa. Bizkaia ere lurralde liderren artean dago, estatuaren barruan.

Bizkaiak ikerketa aplikatuko ahalegin honetan duen indarguneetako bat ezagutza-zentroen ekosistema zabal baten presentzia da; hari esker, gure lurraldea ikerketarako espazio dinamikoa eta erakargarria da, eta emaitza onak ematen ari da, bai ezagutzaren sorkuntzan, bai ezagutza enpresa-sarera transferitzean. Zentro horietako asko Zientzia, Teknologia eta Berrikuntzaren Euskal Sarean daude, bakoitza dagokion kategorian.

Hala ere, ezin dugu ahaztu ezen ezagutza produktu eta zerbitzu bihurtzeko —herriarren esku jarriko direnak— beharrezkoa dela garatutako teknologia enpresetarako transferitzea, edo produktu eta zerbitzuok sortu eta pertsonen esku jar ditzaketen bestelako erakundeetarako. Eta hori da Eusko Jaurlaritzak bultzatutako Zientzia, Teknologia eta Berrikuntzarako Euskadiko 2030 Planak (ZTBP) jasotzen dituen erronketako bat; plan horrek, zehazki, datozen urteetarako I+G+B-a sustatzeko ildo nagusiak ezarri ditu.

ZTBP 2030 planak trantsizio hirukoitza bereganatzen du —teknologiko-digitala, energetiko-klimatikoa eta sozial-sanitarioa—, joera globalen ondorioz eta joera horiek Euskadin duten eraginaren ondorioz sortua. Planak, oro bat, helburu du trantsizio horiekin lotutako bost erronka sozialak —Nazio Batuen garapen iraunkorraren helburuetan jasoa— Euskadin ebazten laguntzea. Ildo horretan, ZTBP 2030 planaren lehen bi zutabe estrategikoak bikaintasun zientifikoa eta buruzagitza teknologiko industrialia dira. Bigarren zutabe horren barruan, hau adierazten da: garrantzi handikoa izango da I. zutabean sortutako bikaintasuneko ezagutzaren benetako integrazioa eta transferentzia, bai Euskadiko enpresek balio-kate globaletan posizionamendu estrategiko ona izan dezaten laguntzeko, bai aipatutako erronka globalei aurre egin ahal izateko.

ZTBPk ezartzen duenez, erabakigarria da, beraz, ZTBESen dauden Bizkaiko zentro zientifiko eta teknologikoen jardura sendotzea eta zentro horien eta enpresen arteko kontaktua eta lankidetzak bultzatzea, indartzeko ekoizpen-sarearen erronka eta beharriazanetan oinarritutako ezagutza berri baten garapena ahalbidetzen duten mekanismoak (market pull) eta aurkikuntza zientifiko edo teknologikoetatik abiatuta sortutako merkatugune berrien garapena ahalbidetzen duten mekanismoak (technology push), ezagutzaren sorkuntzako eta transferentziako dinamikak sistematizatuz.



Dekretu honetan araututako transferentzia teknologikorako laguntzen programaren bidez, ezagutza aplikagarria sortzeko eta Bizkaiko ikerketa-zentroetatik enpresetara transferitzeko erronkan lagundu nahi da; erronka hori bat dator Bizkaia lurralde berritzailerako eta lehiakorra bihurtzeko xedearekin.

Horretarako, dirulaguntzen programa ireki bat diseinatu da, ikerketa aplikatura eta garapen teknologikora bideratua, goi-mailako I+G-ko proiektuei lagundu nahi diena, bereziki, ezagutza Bizkaiko ekoizpen-sarera benetan transferitzera bideratuta daudenei.

Ekonomia Sustatzeko Sailaren 2020-2023 aldiko Dirulaguntzen Plan Estrategikoan dekretu honetan araututako dirulaguntzen lerroa jasotzen da, Bizkaiko Foru Aldundiaren 2021 Urteko Araugintza Planean Foru dekretu hau onartzea aurreikusten da eta Bizkaiko Lurralde Historikoaren Aurrekontu Orokorretan dirulaguntzen programa hau gauzatzeko behar diren kredituak esleitu dira.

## II

Foru dekretu honetan jasotako laguntzek edo dirulaguntzek Europar Batasuneko Funtzionamenduaren gaineko Itunaren 107. eta 108. artikulua aplikatuta barruko merkatuarekin bateragarriak diren laguntza-maila batzuk adierazten dituen 2014ko ekainaren 17ko 651/2014 (EB) Araudi Orokorrean xedatutakoa bete beharko dute.

## III

Euskal Herriaren Autonomia Estatutuaren 9. artikulua hau ezartzen du: «Bizi- eta lan-baldintzen hobekuntzaren aldeko politika bultzatuko dute bereziki» eta «Enplegua gehitzea eta ekonomiaren oreka sustatzeko neurri lagungarriak hartuko dituzte».

Beraz, foru dekretu honen xede den gaiaren gaineko eskumena Bizkaiko Foru Aldundiari dagokio, Euskal Autonomia Erkidegoko Autonomia Estatutuaren 10.25 eta 37.4 artikuluetan xedatutakotik ondorioztatzen denez, Autonomia-Elkarte Osorako Erakundearen eta Bertako Kondaira-Lurraldeetako Foruzko Ihardutze-Erakundearen arteko Harremanei buruzko 1983ko azaroaren 25eko 27/1983 Legearen 6.1 eta 7. artikuluekin eta Bizkaiko Kondaira Lurraldeko Foru Erakundearen Hautapen, Antolaketa, Erregimen eta Funtzionamenduari buruzko otsailaren 13ko 3/1987 Foru Arauaren (aurrerantzean 3/1987 Foru Araua) 17.2 artikuluekin lotuta. Azken artikulua horrek dioenez, Foru Aldundiari dagozkio araubide erkideko diputazioen eskumenekoak diren gaiak, eta, ildo horretan, Toki Araubidearen Oinarriak arautzen dituen apirilaren 2ko 7/1985 Legearen 36 d) artikulua ezartzen du probintziako diputazioen berezko eskumena dela «probintziako lurraldearen garapen ekonomiko eta soziala sustatzeko eta plangintza egiteko lankidetzaren ematea, arlo horretan beste herri-administrazioak dituzten eskumenekin ba etorritik».

## IV

Foru dekretu honetan, genero-ikuspegia jasotzen da, bai hura prestatzeko orduan bai haren aplikazioan, Emakumeen eta Gizonen Berdintasunerako ekainaren 20ko 4/2018 Foru Arauan (aurrerantzean 4/2018 Foru Arauan) ezarritakoarekin bat. Gainera, kontuan hartu da 4/2018 Foru Arauaren 25. artikuluan eta Bizkaiko Foru Aldundiaren azaroaren 19ko 141/2013 Foru Dekretuan xedatutakoa; izan ere, haren bidez, generoaren eraginaren aurretiazko ebaluazioa egiteko jarraibideak ezartzen dira; ebaluazio hori Emakumeen eta Gizonen Berdintasunerako otsailaren 18ko 4/2005 Legean (aurrerantzean 4/2005 Legean) dago aurrez ikusita. Ildo horretan, tramitazioan, foru dekretu horren 2. artikuluan aipatzen den txostena sartu da, hau da, generoaren eraginaren aurretiazko ebaluazioari buruzkoa.

Programa horretan, emakumeen eta gizonen arteko berdintasuna sustatzeaz gain, kohesioari laguntzeko, egungo politika publikoaren aplikazioa sendotzen duten klausula sozialak sartu dira. Helburu horretarako, dirulaguntzetarako prozeduretan klausula sozialak, ingurumenekoak eta beste politika publiko batzuei buruzkoak sartzeko gidaren gomendioei jarraitu zaie, gida horrek erraztu egiten baitu arau hauetan ezarritakoa aplikatzea: Dirulaguntzen Erregelamenduari buruzko martxoaren 23ko 34/2010 Foru Dekretuaren (aurrerantzean, Dirulaguntzen Erregelamendua) 45. artikulua aldaketa. Foru



dekretu horren bidez, maiatzaren 31ko 5/2005 Foru Araua garatu zen, Foru Administrazioak emaniko dirulaguntzen araubide juridiko orokorra arautzen duena (aurrerantzean, 5/2005 Foru Araua). Adierazitako 45. artikuluko hori otsailaren 27ko 16/2018 Foru Dekretuaren bidez aldatu zen, eta Bizkaiko Batzar Nagusiek 2017ko urriaren 18an onetsitako mozioaren ondorioz izapidetu zen.

Dekretua eratzean kontuan hartu de maiatzaren 28ko 63/2019 Foru Dekretuan xedatutakoa —haren bidez, Bizkaiko Foru Aldundiaren jardun-eremuan hizkuntza ofizialak erabiltzeko irizpideak ezartzen dira.

Foru dekretu honek bete egiten ditu erregulazio onaren printzipioak, zeinak Administrazio Publikoaren Administrazio Prozedura Erkidearen urriaren 1eko 39/2015 Legean (aurrerantzean, 39/2015 Legean) aurreikusten diren eta Bizkaiko Foru Aldundian xedapen orokorrak egiteko prozedura arautzen duen Bizkaiko Foru Aldundiaren urtarrilaren 17ko 2/2017 Foru Dekretuaren (aurrerantzean 2/2017 Foru Dekretua) 3. artikuluan jasotzen diren.

Foru Dekretu hau egiteko eta izapidetzeko, 2/2017 Foru Dekretuan ezarritako izapideak egin dira, eta Generoaren araberako Eraginaren Aurretiazko Ebaluazioari, Kontrol Ekonomikoari eta legedia betetzeari buruzko nahitaezko txostenak egin dira.

2/2017 Foru Dekretuaren arabera, dekretu honen aurretiazko kontsulta publikoaren izapidea egin da, eta jasotako ekarpenei buruzko memoria bat egin da. Era berean, entzunaldiaren eta jendaurreko informazioaren izapidea egin da, non ez den alegaziorik jaso, eta tramite hori ixteko memoria bat egin da.

## V

5/2005 Foru Arauaren 8.3 eta 16.1 artikuluetan xedatutakoa eta Dirulaguntzen Araudiaren 41. artikuluan xedatutakoa modu koordinatuan irakurrita, ondorioztatzen da Bizkaiko Foru Aldundia gaituta dagoela foru-dekretu bidez dirulaguntzak emateko oinarri arautzaileak onartzeko, oinarriak dirulaguntza mota bakoitzari buruzkoak izango direla, eta oinarri arautzaileak eta dirulaguntzen deialdia batera onartzeko aukera dagoela. Horretarako Bizkaiko Foru Aldundiaren foru dekretuaren proiektua Gobernu Kontseiluari aurkeztu behar zaio, onar dezan.

Araugintza-ekimenari dagokionez, Ekonomia Sustatzeko foru diputatuari dagokio, 1987ko otsailaren 13ko 3/1987 Foru Arauaren 39.k) artikuluan eta sail horren egitura organikoari buruzko erregelamendua onesten duen Bizkaiko Foru Aldundiaren 2019ko abenduaren 17ko 207/2019 Foru Dekretuaren 1. Artikuluan xedatutakoaren arabera.

Edonola ere, Gobernu Kontseiluari dagokio aztertzea bidali den testua onartzea, 3/1987 Foru Arauaren 17. artikuluan xedatutakoaren arabera.

Horrenbestez, Ekonomia Sustatzeko Saileko foru-diputatuaren ekimenez, eta aurrez Bizkaiko Foru Aldundiak 2021eko abuztuaren 24ko bileran azterturik, honako hau

### XEDATZEN DUT:

#### **Artikulu bakarra.— Oinarri arautzaileak eta deialdia onestea**

Ekonomia Sustatzeko Sailaren Teknologia Transferentzia 2021 dirulaguntzen programaren oinarri arautzaileak eta deialdia onartu dira. Programa horren testua foru dekretu honi atxikita dago eranskin gisa, eta haren xedapen-zatiari erantsita, ondorio guztietarako.

### XEDAPEN GEHIGARRIAK

#### **Xedapen Gehigarri Bakarra.— Aurrekontu erregimena**

1. Aurrekontuko partidei esleitutako kopuruak gutxi gorabeherakoak dira. Onartzen diren eskabideen arabera erakunde onuradunen izaera juridikoak askotarikoak izan daitezke, aurrekontuko partidei esleitutako baliabide ekonomikoak aurrekontuko kapitulu bereko beste partiden artean egokitu ahal izango dira. Horretarako, ez da beharrezkoa izango foru dekretu hau aldatzea, betiere partiden zenbateko osoak ezarritako muga gainditzen ez badu.



2. Horrez gainera, eskabide guztiak ebatzi ondoren ez bada iristen gehieneko aurrekontu-mugara, gastu-baimena deuseztatzea tramitatuko da, soberan den zenbatekoan, eta horretarako ez da beharrezkoa izango foru dekretu hau aldatzea.

3. Dirulaguntzen Erregelamenduaren 43. artikulua babesean aurrekontuko zuzkiduren guztizko zenbatekoa areagotu ahal izango da, gehienez ere 1.000.000,00 euro gehituz, baldin eta eskuragarri dauden kredituak areagotu badira kreditua handitzea onartu delako edo kreditua sortu edo gehitu delako edo baldin eta kopuru osagarri bat badago aurreko deialdietan aurkeztutako eskaeren zenbatekoa aurrez ikusitakoa baino txikiagoa izan delako; kasu horietan, kreditu osagarri hori soilik izango da eraginkorra baldin eta kreditu horren erabilgarritasuna adierazita badago. Adierazpen hori dirulaguntza emateko ebazpena eman aurretik egin beharko da. Organo eskudunak baimenduko du kopuru handitze hori.

#### XEDAPEN IRAGANKORRAK

##### **Xedapen Iragankor Bakarra. — Jakinarazpen elektronikoa**

Jakinarazpen elektronikoa buruzko betebeharrari dagokionez, jakinarazpena egiten denean bitarteko elektronikoen bitartez egiteko prozedura ez badago teknikoki amaituta, jakinarazpena paperean egingo da, posta ziurtatuaren bidez.

#### AZKEN XEDAPENAK

##### **Amaierako Lehen Xedapena. — Arauen garapena**

Ekonomia Sustatzeko diputatuak ahalmena izango du honako foru dekretu hau garatu, betearazi eta aplikatzeko beharrezkotzat jotzen dituen xedapen guztiak emateko, bai eta kasu bakoitzean dagokion diru-laguntza ematea ere; aurrekontu-zuzkidura amaitu ezean, deialdi berriak egiteko eta subrogazio-eskaerak ebazteko. Era berean, Ekonomia Sustatzeko foru diputatuari baimena ematen zaio eskabideak aurkezteko epea luzatzeko, 39/2015 Legearen 32.4 artikuluan aurreikusitako kasua gertatzen bada, hau da, dagokion sistemaren ohiko funtzionamendua edo aplikazioa eragotzi duen gorabehera teknikoren bat gertatzen bada.

##### **Amaierako Bigarren Xedapena. — Indarrean jartzea**

Foru dekretu hau Bizkaiko Aldizkari Ofizialean argitaratu eta biharamunean jarriko da indarrean.

Bilbon, 2021eko abuztuaren 24an.

Ahaldun Nagusia,  
UNAI REMENTERIA MAIZ

Ekonomia Sustatzeko foru diputatua,  
AINARA BASURKO URKIRI

**TEKNOLOGIA TRANSFERENTZIA 2021 DIRULAGUNTZEN  
PROGRAMAREN OINARRI ARAUTZAILEAK ETA DEIALDIA**

## AURKIBIDEA

**I. kapitulua. — Xedapen orokorrak.**

1. oinarria. — Xedea eta helburua.
2. oinarria. — Aurrekontuko zuzkidura.
3. oinarria. — Definizioak.
4. oinarria. — Entitate onuradunak.
5. oinarria. — Diruz lagun daitekeen egitatea.
6. oinarria. — Emateko prozedura.
7. oinarria. — Balorazio irizpideak.
8. oinarria. — Laguntzen zenbatekoa.
9. oinarria. — Dirulaguntza jaso dezaketen gastuak.
10. oinarria. — Burutzeko epeak.
11. oinarria. — Dirulaguntza metaketa.
12. oinarria. — Dirulaguntzen bateragarritasuna.

**II. kapitulua. — Aplikatu beharreko araudia eta antolaketa-xedapenak.**

13. oinarria. — Ezarri beharreko arautegi orokorra.
14. oinarria. — Laguntzak emateko prozedura antolatu, aztertu eta ebatziko duten organo eskudunak.
15. oinarria. — Erakunde laguntzaileak.

**III. kapitulua. — Prozedurazko xedapenak.**1. atala. — *Xedapen espezifikoak.*

16. oinarria. — Eskabideak aurkezteko epea.
17. oinarria. — Gehienez aurkez daitezkeen eskabideak.
18. oinarria. — Eskabidean aurkeztu beharreko agiriak.
19. oinarria. — Justifikatzeko epea.
20. oinarria. — Justifikatzeko modua eta dokumentazioa.
21. oinarria. — Dirulaguntza ordaintzea.
22. oinarria. — Laguntzaren publizitatea.

2. atala. — *Eskabideen instrukzioa eta ebazpena.*

23. oinarria. — Eskabideak nola aurkeztu.
24. oinarria. — Txostenaren instrukzioa.
25. oinarria. — Eskabideen ebaluazioa.
26. oinarria. — Ebazpen proposamena.
27. oinarria. — Aurrekontuaren muga.
28. oinarria. — Ebazteko epea.
29. oinarria. — Ebazpena.
30. oinarria. — Errekurtsoak.
31. oinarria. — Dirulaguntzari uko egitea.
32. oinarria. — Jakinarazpen elektronikoa.
33. oinarria. — Dirulaguntzen argitaratzea.

3. atala. — *Dirulaguntzen kudeaketa eta egiaztapenari buruzko xedapenak.*

34. oinarria. — Dirulaguntza jaso dezaketen gastuetarako irizpide orokorrak.



- 35. oinarria. — Gastuen egokitzapena.
  - 36. oinarria. — Azpikontratazioa.
  - 37. oinarria. — Eskaintza aukeratzea.
  - 38. oinarria. — Jarraipena.
  - 39. oinarria. — Justifikatzeko modua.
  - 40. oinarria. — Baldintzak aldatzea.
4. atala. — *Dirulaguntzak itzultzea eta arau hauste administratiboak.*
- 41. oinarria. — Dirulaguntza erakunde onuradunak berak itzultzea.
  - 42. oinarria. — Ez betetzeak.
  - 43. oinarria. — Ez betetzeak mailakatzeko irizpideak.
  - 44. oinarria. — Zehapen-prozedura.



## I. KAPITULUA

**XEDAPEN OROKORRAK****1. oinarria.— Xedea eta helburua**

1. Oinarri arautzaile eta deialdi hauen xedea 2021eko deialdian Teknologia Transferentzia dirulaguntzen programa arautzea da.
2. Teknologia Transferentzia laguntza Programaren helburua teknologiaren heldutasuna erraztea da, Ikerketa eta Garapeneko proiektuen bidez, Bizkaiko enpresa-ehunetik teknologia hori praktikan aplikatu ahal izateko.
3. Xede horrekin erakunde onuradunei dirulaguntzak eskaintzen dizkie.

**2. oinarria.— Aurrekontuko zuzkidura**

Deialdi honetan eman daitezkeen laguntzak eta onurak (guztira 2.800.000,00 euro) jarraian zerrendatuko diren aurrekontu-partidetan, aurrekontu proiektu eta urtekoetatik ordainduko dira; gutxi gorabeherako kopuruetan banakatuta agertuko dira, eta muga partida bakoitzean ezarritako guztizko kopurua izango da:

| 08.02/45100/426.107<br>Proiektu zk.: 2019/0097 |                   |
|--|-------------------|
| Ekitaldia                                      | Zenbatekoa (euro) |
| 2021   | 1.430.000,00      |
| 2022   | 1.370.000,00      |
| GUZTIRA  | 2.800.000,00      |

**3. oinarria.— Definizioak**

Foru dekretu honetan definizio hauek biltzen dira. Hemen islatu edo jaso ez den guztian Itunaren 107 eta 108. artikulua (DO, L 187, de 26-06-2014) aplikatuta barruko merkatuarekin bateragarriak diren laguntza-maila batzuk adierazten dituen 2014ko ekainaren 17ko 651/2014/EE Araudian jasotako definizioak izango dira aginduzkoak (aurretik zehaztutako, 651/2014 (EE) Araudi Orokorra):

- a) «Oinarritzko ikerketa»: fenomeno eta gertakari behagarrien azpian dauden oinarri buruzko ezagutza berriak eskuratzeko helburu nagusiarekin hasitako lan esperimental edo teorikoak, zuzeneko aplikazio edo erabilera komertzialik gabe.
- b) «Ikerketa industrial»: produktu, prozesu edo zerbitzu berriak garatzeko edo lehendik daudenak nabarmen hobetzeko baliagarriak izan daitezkeen ezagutza eta gaitasun berriak eskuratzeko bideratutako ikerketa planifikatua edo azterlan kritikoak; terminoaren barruan, sistema konplexuen osagaien sorkuntza sartzen da; oro bat sar daiteke prototipoak laborategi-ingurune batean eraikitzea, edo dauden sistemekin simulatutako interfaseak dituen ingurune batean; eta lerro pilotuak ere bai, ikerketa industrialerako beharrezkoa bada, bereziki, teknologia generikoa baliozkotzeko.
- c) «Garapen esperimental»: zientziaren, teknologiaren, enpresaren eta abarren esparruetako jakintzak eta teknikak (aurretik existitzen zirenak) eskuratzeko, konbinatzea, itxuratzea eta erabiltzea, produktu, prozesu edota zerbitzu berrien, aldatuen edo hobetuen plan eta egitura edota diseinuak egiteko xedearekin. Barnean hartu ahal izango ditu, esate baterako, produktu, prozesu eta zerbitzuen kontzeptuen definiziorako, plangintzarako eta dokumentaziorako beste hainbat jardura.

Laguntza programa honen arabera, garapen esperimentalak prototipo eta proiektu pilotuak garatzea ere barne har dezake, produktu, prozesu edo zerbitzu berrien edo hobetuen saiakuntza eta balioztatzea, funtzionamenduaren baldintza errealak diren ingurune adierazgarrietan, baldin eta helburu nagusia hobekuntza





tekniko berriak ekartzea bada guztiz sendotua ez dauden produktu, prozesu edo zerbitzu horiei; prototipo eta edo proiektu pilotuen garapena ere diruz lagundu daitezke, ezinbestean, azken merkataritza-produktua denean eta bere fabrikazioa soilik erakusketa- eta balioztatze-helburuetarako garestiegi denean.

Garapen esperimentalak ez ditu barne hartzen produktuetan, produkzio-lerroetan, fabrikazio-prozesuetan, existitzen diren zerbitzuetan eta martxan dauden bestelako jardueretan egindako ohiko edo aldizkako aldaketak, horrelako aldatetek hobekuntzak eragin baditzakete ere.

- d) «Bideragarritasun-azterlana»: proiektu baten indarra ebaluatu eta aztertzea, erabakiak hartzeko prozesua objektiboki eta zentzuz laguntzeko, haren puntu ahulak eta indartsuak eta aukerak eta erasoak aurkituz, eta hura burutzeko beharrezko baliabideak eta, azken batean, haren arrakasta-aukerak zehazteko, hain zuzen ere.
- e) «Heldutasun teknologikoaren maila»: teknologia baten garapen-gradua oinarriko printzipioetatik ingurune errealean praktikoki erakutsi arte definitzeko eskala. Dekretu honen ondorioetarako, 9 mailako eskala ezarri da (1. TRL — 9. TRL), zeina Europar Batasunak jasotzen baitu Horizontea 2020 — Lan Programa 2014-2015 programaren G eranskinean.
- f) «Especializazio adimenduna»: Europako Batzordeak Europar Batasuneko eskualdeei jarritako erronka, beren I+G+b baliabideak arlo zehatzetan bil ditzaten, RIS3 siglekin bat. Horri dagokionez, Zientzia, Teknologia eta Berrikuntzako 2030 Planak lehentasunezko hiru sektore ezartzen ditu Euskadin: Industria adimenduna, energia garbiagoak eta osasun pertsonalizatua; eta lau aukera-eremu: Elikadura osasungarria, ekoberrikuntza, hiri jasangarriak eta Euskadi sortzailea.
- g) «Lan-zentroa»: antolamendu espezifiko duen ekoizpen-unitatea, hala alta emanda dagoena lan-agintaritzaren aurrean, lantoki bat osatzen duena Langileen Estatutuaren Legearen testu bategina onartzen duen urriaren 23ko 2/2015 Legegintzako Errege Dekretuaren 1.5 artikulua arabera.

#### **4. oinarria.— Entitate onuradunak**

1. Dirulaguntzak eskuratu ahal izango dituzte beheko baldintzak betetzen dituzten erakundeek:

- a) Zientzia, Teknologia eta Berrikuntzaren Euskal Sareko kide den eragile zientifiko-teknologikoa izatea, eta horretarako egiaztatuta egotea, Zientzia, Teknologia eta Berrikuntzaren Euskal Sarearen osaera arautzeari eta eguneratzeari buruzko ekainaren 23ko 109/2015 Dekretuan eta haren xedapen iragankorretan edo hura ordezkatzeko duen araudian ezarritakoarekin bat. Kategoria hauetako baten barruan egon behar du:
  - i. Oinarriko eta bikaintasuneko ikerketa-zentroak.
  - ii. Zentro teknologiko multifokalizatuak.
  - iii. Zentro teknologiko sektorialak.
  - iv. Ikerketa kooperatiboko zentroak.
- b) Gutxienez lan-zentro bat Bizkaiko Lurralde Historikoan izatea.
- c) Berezko nortasun juridikoa izatea.
- d) Zerga betebeharrak, Gizarte Segurantzarekikoak eta dirulaguntzak itzultzearen ondoriozkoak eguneratuta edukitzea.
- e) Emakumeen eta Gizonen berdintasunerako ekainaren 20ko 4/2018 Foru Arauaren (aurrerantzean 4/2018 Foru Arauan) 42. artikuluan ezarritako egoeraren batean ez egotea.
- f) Ez egotea Dirulaguntzei buruzko Foru Administrazioak emaniko dirulaguntzen araubide juridiko orokorra maiatzaren 31 5/2005ko Foru Arauaren (aurrerantzean 5/2005 Foru Araua) 12. artikuluan azaltzen diren inguruabarretako batean ere.

Aurreko baldintzak eskabidea aurkezten den unean egiaztatu behar dira, eta ebazpena eman, justifikazioa egin eta ordainketa egin arte mantendu beharko dira.





2. Foru dekretu honen aplikazio-eremutik kanpo geratzen dira krisian dauden enpresak, krisian dauden enpresa ez-finantzarioen salbamendu eta berregituraketako estatuko laguntzei buruzko Gidalerroetan (DO C 249 31-07-2014) haiei buruz jasotako definizioaren arabera. Salbuespen gisa, 2019ko abenduaren 31n krisian ez zeuden baina 2020ko urtarrilaren 1etik 2021eko abenduaren 31ra bitartean krisian egotera pasatu ziren enpresak onuradun izan daitezke.

3. Foru dekretu honetatik kanpoan geratzen da esplizituki legez kontrakoa edo barruko merkatuarekiko bateraezin adierazi duen Batzordearen aurretiko adierazpen baten ondoren berreskuratzeko zain dauden enpresentzako banakako laguntzen ordainketa.

4. Dirulaguntzaren bat jasotzen duten erakunde onuradunek 5/2005 Foru Arauaren 13. eta 41. artikuluetan xedatutakoa bete beharko dute. Bereziki, jasotako fondoak zertan erabili diren frogatzen duten agiri guztiak gorde beharko dituzte, agiri elektronikoak barne, finantza-kontrolaren eginkizunak dituzten organoen egiaztapen-jardueren eta kontrol-jardueren xede izan baitaitezke, eta haiei lankidetzak eskaini beharko diete. Era berean, Europako funtsei buruzko xedapen erkideak ezartzen dituen abenduaren 17ko 1303/2013 (EB) Erregelamenduaren (aurrerantzean 1303/2013 (EB) Erregelamendua) 125.4. artikuluan xedatutakoa bete beharko dute.

5. Dirulaguntzen onuradun diren erakundeek 4/2018 Foru Arauaren 46. artikuluan ezarritakoa bete beharko dute; zehazki, modu aktiboan sustatu beharko dute emakumeen eta gizonen berdintasuna, eta lan-baldintza duin eta gizalegezkoak, diskriminaziorik sortzen ez dutenak, bermatu.

#### **5. oinarria. — Diruz lagun daitekeen egitatea**

1. Dirulaguntza jaso dezaketen egitate izango dira kategoría hauetako batean jarduketak burutzen dituzten ikerketa- eta garapen-proiektuak: oinarritzko ikerketa, ikerketa industrialia, garapen esperimentalak eta bideragarritasun-azterlanak.

2. Lehentasuna emango zaie heldutasun teknologikoaren goi-mailetan (TRL) garatu eta enpresentzako teknologia-transferentziako jarduerak (merkataritza-ustiapenerako) jasotzen dituzten proiektuei. Lehentasuna emango zaie, oro bat, RIS3 espezializazio adimentsuaren estrategian adierazitako eremuetan garatzen diren proiektuei; estrategia hori Zientzia, Teknologia eta Berrikuntzarako Euskadiko 2030 Planean ezarrita dago.

3. Dirulaguntza jasoko duten proiektuak eskabidea egin duen enpresan aplikatu eta ezartzeko modukoa izango da, enpresa bera izango da onuraduna eta bere jarduerarekiko koherentzia mantenduko da, eta soilik hartuko dira diruz laguntzeko modukotzat Bizkaiko Lurralde Historikoko ekoizpen zentroetan zuzenean aplikatzeko diren jardueren gastuak.

4. Nolanahi ere, proiektuak sexu arrazoiengatik ez dira baztertzailak izango, eta ahal dela, sexuaren araberako rolak eta estereotipoak ezabatu beharko dituzte.

5. Honako proiektu hauek ez dira diruz lagunduko:

- a) Erakundearentzat berrikuntzarik ekartzen ez duten proiektuak.
- b) Kontratu bidezko ikerketa eta ikerketa-zerbitzuak ematea.
- c) Ekoizpen esperimentalak, aurre-serieen fabrikazioa eta ekoizpenaren industrializazioa.
- d) Kalitate-kontrolerako edo homologaziorako ohiko entseguak.
- e) Bizkaiko Lurralde Historikoko zentroetan aplikatu ezin diren proiektuak.
- f) Definizioan (argitasuna, plangintza, egikaritzeko metodologia...) edo proiektuari esleitutako baliabideetan (baliabide teknikoak, giza taldea, zuzkidura ekonomiko...) gabezia argiak dauzkaten proiektuak.
- g) Bizkaiko Foru Aldundiaren Ekonomia Sustatzeko Sailaren bestelako programa edo jarduketa arloen barruan sar daitezkeen jarduerak.
- h) Ekonomia Sustatzeko Sailaren helburuekin bat ez datozen edota Ekonomia Sustatzeko Sailaren eskuduntzen eremuan sartzen ez diren jarduerak.



6. Ez dira diruz lagun daitekeen egitatearen barruan hartuko aurkeztutako proiektuaren zati nuklearrari guztiz uztartuta ez dauden edo harekin lotura gutxi edo loturarik ez duten jarduketak.

#### **6. oinarria.— Emateko prozedura**

1. Dirulaguntzak norgehiagokako araubidearen arabera esleituko dira, hautaketa-prozedura bakarren bidez, urte horretan dirulaguntza egitarau honentzat deialdi bat baino gehiago onartzeko aukeraren kaltetan jo gabe.

2. Foru dekretu honen ondorioetarako, hauxe hartzen da norgehiagokatzat: dirulaguntzak emateko prozesu honetan aurkeztutako eskabideak alderatu egiten dira, arlo eta atal bakoitzean ezarri diren balorazio-irizpideekin bat etorritik haien artean hurrenkera bat ezartzeko. Horrela, deialdi honen barruan eskura daitekeen kreditua muga moduan ezarrita, baloraziorik handiena lortu duten eskabideek jasoko dute dirulaguntza.

#### **7. oinarria.— Balorazio irizpideak**

1. Onuradun izateko baldintzak betetzen dituztela frogatzen duten enpresetik, baloraziorik onena lortzen dutenek jasoko dituzte dirulaguntzak, aurrekontuan baliagarri dagoen mugaren barruan, honako irizpide hauen arabera eta adierazitako ponderazio edo haztaperak eginez. Irizpide bakoitzean ebaluaziorako aintzat hartuko diren alderdiak adierazten dira:

1. irizpidea.— *Orientazio zientifiko-teknologikoa (30 puntu, gehienez):*

- 1.a Proposamenaren egokitasuna: proiektuaren ekarpen zientifiko-teknikoa, oraingo artearen egoerari dagokionez; aurretiko esperientzia, eta enpresa-, ekoizpen- eta gizarte-arloetan aurkitutako beharrianak (10 puntu, gehienez).
- 1.b Euskadiko espezializazio adimenduneko RIS3 estrategiarekiko lotura (10 puntu, gehienez).
- 1.c Berrikuntza- eta originaltasun-gradua: proposamenaren haustura-gradua, eta ezagutza originala sortzeko gaitasuna (5 puntu, gehienez).
- 1.d Espero izandako zuzeneko emaitzak: proiektuaren emaitzen garrantzia eta zehaztasuna — argitalpenak, biltzarretan aurkezpenak egitea, produktuen garapen berriak, prozesuak eta aplikazioak — (5 puntu, gehienez).

2. irizpidea.— *Transferentzia teknologikoa eta proiektuaren eragina (40 puntu, gehienez):*

- 2.a Proiektuko teknologia zuzentzen zaion sektore ekonomikoak Bizkaian duen tamaina (10 puntu, gehienez).
- 2.b Proiektuak teknologia ustiatu lezaketen enpresen lehiakortasunean izan lezakeen eragina (10 puntu, gehienez).
- 2.c Merkatuarekiko hurbiltasuna; teknologia goi-mailako heldutasun-mailara eramateko garatutako proiektua (10 puntu, gehienez).
- 2.d Bizkaiko enpresa zehatzek proiektuan duten interesa eta hari eginiko ekarpenak (10 puntu, gehienez).

3. irizpidea.— *Proiektuaren definizioa eta aurkeztutako proposamenaren kalitatea (25 puntu, gehienez):*

- 3.a Proiektuaren bideragarritasuna (5 puntu, gehienez).
- 3.b Proiektua gauzatzeko bideratutako giza taldearen dimentsioa eta gaitasuna.
- 3.c Proiektura bideratutako baliabideen egokitasuna
- 3.d Proiektuaren plangintza, helburuak, adierazleak eta jarraipen-sistematika (5 puntu, gehienez).
- 3.e Aurrekontu nahikoa eta finantzazio-iturri jakinak eta egokiak (5 puntu, gehienez).

**4. irizpidea. —Konpromiso soziala eta iraunkortasuna (3 puntu, gehienez)**

Irizpidea honetan, kontuan hartuko da enpresak ziurtagiriak eta /edo planak izatea arlo hauetan: ingurumenaren iraunkortasuna, genero-berdintasuna, euskararen sustapena eta erantzukizun sozial korporatiboa.

**5. irizpidea. —Gizonen eta emakumeen parte-hartze orekatua proiektuan (2 puntu, gehienez)**

Irizpide honetan, kontuan hartuko dira proiektuan parte hartuko duten enpresako langileetako gizonen eta emakumeen kopurua eta proiektuan gizonen eta emakumeen duten erantzukizunen banaketa.

2. Irizpide horiek erabiliz organo instruktoreak ebaluazioa egingo du eta azken balorazioa dakarren ondorioen txostena egingo du; hortik aterako da aurkeztutako proiektuen sailkapena.

3. Gutxienez 40 puntu lortu dituzten eskabideek bakarrik lor lezake dirulaguntza.

**8. oinarria. — Laguntzen zenbatekoa**

1. Programa honetan ezarritako onurak ezarritako egitate eta diruz lagun daitezkeen gastuengatik dirulaguntzak dira. Dirulaguntzak ikerketa- eta garapen-proiektuetarako laguntzat hartzen dira, 651/2014 (EB) Erregelamenduaren 25. artikulua besean.

2. Dirulaguntzaren zenbatekoa kalkulatu da %25raino diruz lagun daitezkeen gastuei aplikatuz.

3. Dirulaguntzen gehieneko ehunekoa (%25) diruz lagundu daitezkeen espedienteen oinarriari aplikatuta gaitzen bada dirulaguntzen programaren aurrekontu-zuzkidura, orduan, hainbatu egingo da aurrekontu-zuzkidura.

4. Erakunde eskatzaile bakoitzeko, lagundutako proiektu bakoitzean 200.000 euro emango dira gehienez.

5. Ez da 25.000 eurotik beherako dirulaguntzarik emango. Muga hori ez da aplikatuko laguntzaren azken zenbatekoa 11. eta 12. oinarrietan ezarritako laguntzen metaketa eta bateragarritasun irizpideen ondorioz egindako murrizketa baten emaitza bada, edo erabilgarri dagoen kreditua agortu delako egin den murrizketa baten ondorio bada.

6. Jarduketa burutzeko unea zein ere den, laguntza aurrekontuko ekitaldi bati edo hainbati esleitu ahalko zaie.

**9. oinarria. — Dirulaguntza jaso dezaketen gastuak**

1. Laguntza egitarau honetan aurkeztutako proiektuen diruz laguntzeko moduko oinarria zenbatekotzeko, proiektuaren aurrekontua hartuko da kontuan. Aurrekontuak kontzeptuak desglosaturik egon behar du.

2. Honakoak izango dira diruz lagun daitezkeen gastuak, adierazitako kategorietan:

- a) Aurkeztutako proiektuak iraun bitartean, proiektua burutzeko lanari dagozkion eskatzailearen barneko langileria-gastuak (ikertzaileak, teknikariak eta laguntza-langileak).
- b) Tresnen eta materialaren kostuak, proiekturako erabiltzen diren neurrian eta epean; tresnak eta materiala haien balio-bizitza osoan zehar erabiltzen ez badira proiekturako, proiektuaren iraupenari dagozkion amortizazio-kostuek baino ez dute jasoko dirulaguntza, kostuok oro har onartuta dauden kontabilitate-printzipioen arabera kalkulatu dira.
- c) Kontratu-ikerketen kostuak, eta lehia beteko baldintzetan kanpoko iturrien lizentzia bidez eskuratu edo lortutako ezagutza eta patenteenak, eta proiektura modu eksklusiboan bideratutako aholkularitza-gastuak eta zerbitzu baliokideenak;
- d) Gastu orokorrak eta bestelako ustiapen-gastu gehigarriak, materialarenak, hornigaiak eta antzeko produktuenak barne, baldin eta proiektuarekin zuzenean lotura badute.



3. Aurreko apartatuetan aipatutako gastuak —dirulaguntza jaso dezaketenak— 651/2014 (EB) Erregelamenduaren 2. eta 25. artikuluetan ezarritakoaren arabera interpretatuko dira.

4. Barneko langileria-gastuen barruan sartuko dira soldata gordina eta gizarte kargak (Gizarte Segurantzaren) erakunde eskatzaileari eragiten dizkieten zuzeneko gastuak, bai eta zeharkako gastuak ere.

5. Langileen zuzeneko kostua kalkulatzeko, pertsona bakoitzaren ordu-kostua aplikatuko zaio proiektuari eskainitako ordu-kopuruari. Pertsona bakoitzeko orduko kostua kalkulatzeko horrela egingo da:

$$\frac{\text{GSKO} \times 12 \times 1,25}{\text{Urteko ordu kopurua}}$$

Non:

- i. GSKO gertaera arruntak direla-eta langileak Gizarte Segurantzari egin beharreko hileko kotizazio-oinarria da. Beste kotizazio-araubide batzuen mendeko pertsonen dagokienez, Gizarte Segurantzaren araubide orokorreko oinarriarekin parekatutako oinarri bat hartuko da.
- ii. Urteko ordu kopurua langileak, lan-hitzarmenaren arabera, urtean egin beharreko ordu-kopurua da, kasu bakoitzean lanaldiaren murrizketaren portzentajea kontuan hartuta, halakorik egonez gero. Besterik adierazi ezean urteko 1.720 orduko hartuko dira.

Lan elkartuko kooperatibetako bazkide langileen kasuan, Gizarte Segurantzako Araubide Orokorrean sartuta ez badaude, baliokidea den kalkulu-sistema bat erabiliko da.

6. Zeharkako langileria-gastuei dagokienez, berriz, erakundearen administrazio gastu orokorren zati proportzionalari dagozkionak dira (energia elektrikoa, telefonoa, administrazio langileak, alokairuak...). Dirulaguntza jaso dezakeen oinarria kalkulatzeko orduan, onartutako zuzeneko langileria-kostuen %15 onartuko da gehienez.

7. Ondoko hauek ezin izango dute dirulaguntza jaso:

- a) Ez dute dirulaguntzarik jasoko entitate onuradunen langileen zuzeneko gastuek —entitateok direla sektore publikoak, direla partaidetza publiko gehiengoduna duten entitateak—, baldin eta kostuak osorik finantzatu baditu administrazio publikoren batek. Langileen zuzeneko gastu horiekin lotutako zeharkako gastua, aldiz, diruz laguntzekotzat joko da.
- b) 500 euro (BEZa kenduta) baino gutxiagoko gastuen frogagiriak sortzen dituzten kanpoko gastuak edo kanpoko inbertsioak. Salbuespen gisa, beste gastu batzuk onartuko dira, baldin eta haien sortzapen edo ordainketa epetan edo erlotan zaitu bada, eta adierazitako zenbatekoa baino gutxiagoko justifikazio-agiriak sortzen badituzte; horretaz gain, seriean zehar trazabilitate argia egon behar da, dirulaguntza jaso dezakeen gastuaren kontzeptu berari lotutako kopurua osoa 500 euro edo gehiago dela egiaztatzea ahalbidetzeko.
- c) Zergak eta tasak, BEZa barne (BEZa berreskuratu ezin den kasuetan ere bai), eta jabetza industrialaren babesteko prozesuei lotutako tasak kanpo utzita.
- d) Ekonomia Sustatzeko Sailaren beste laguntza-programa batzuetan diruz lagun daitezkeen beste gastu guztiak.

4. Dena dela, 34. oinarrian ezarritakoa beteko da. Artikulu horretan dirulaguntza jaso dezaketen gastuetarako irizpide orokorrak adierazten dira.

5. Diruz lagun daitezkeen gastuaren balorazioa euroa ez den beste txanpon bat erabiliz egingez gero, fakturaren datan egingo da eurorako trukea.

6. 10. oinarrian ezarritako burutzeko epearen barruan (laguntza eskatzen den datatik 2023ko ekainaren 30era bitartean, biak barne) sortutako eta fakturatutako gastuak lagundu ahal dira diruz, beti ere 19. oinarrian ezarritako justifikatzeko azken egunera arte (2023ko uztailaren 31) ordainduta badaude. Kanpoko gastuetan fakturazio data hartuko da erreferentzia gisa sortzeari buruzko kontabilitate-printzipioa urratzen ez badu.

**10. oinarria. — Burutzeko epeak**

1. Laguntza-programa honetara aurkeztutako jarduerak laguntza-eskabide aurkeztu ondoren hasi beharko dira eta 2023ko ekainaren 30a baino lehen amaitu.
2. Salbuespen gisa eta 38.6 oinarrian jasotako baldintzetan, enpresa onuradunak proiektua egiteko eta/edo justifikatzeko epea luzatzeko eskatu ahal izango du. Luzatzeko eskaera egiteko azken eguna gauzatzeko epea amaitu baino hilabete natural bat lehenago izango da.
3. Luzapena onesten bada, ebazpen espresu bat emango da, non proiektua egiteko eta/edo justifikatzeko epe berriak adieraziko diren. Ebazpen espresurik ematen ez bada, administrazio-isiltasuna negatiboa izango da ezezpeneko eraginarekin.

**11. oinarria. — Dirulaguntza metaketa**

1. Foru dekretu honetan jasotako laguntzek edo dirulaguntzek 651/2014 (EE) Araudi Orokorrean xedatutakoa izango dute eta, ondorioz, arau hori ez betetzeak erantzukizun penal, zibil eta administratiboa ekar diezaioke arau-haustea egin duen enpresari.
2. Diruz lagun daitezkeen eta identifika daitezkeen kostuak ezin izango dira honako hauekin pilatu:
  - a) Estatutik etorritako beste edozein laguntzarekin, baldin eta laguntza-neurri horiek diruz lagun daitezkeen eta identifika daitezkeen kostu ezberdinetakoak badira;
  - b) Estatutik etorritako beste edozein laguntzarekin —zati batean edo oso-osorik— diruz lagun daitezkeen kostu berberekoak badira, bakarrik pilaketa horrek laguntzen intentsitatea edo araudi horren arabera laguntza horri ezarri beharreko laguntza-kopururik handiena gainditzen ez badu.
3. 651/2014 (EE) Araudi Orokorraren bidez salbuetsita dauden laguntzak ez dira pilatuko dirulaguntza jaso dezaketen kostu berberei dagozkien minimis laguntzekin, pilaketa horrek araudi orokorraren III. kapituluan eta foru dekretu honen 6. oinarrian ezarritako laguntzaren muga gainditzen badu.

**12. oinarria. — Dirulaguntzen bateragarritasuna**

1. Foru dekretu honen itzalpean ematen diren laguntzak bateragarriak izango dira beste erakunde publiko edo pribatu batzuek kontzeptu beragatik ematen dituztenekin, beti ere foru dekretu honen 11. oinarrian aipatzen diren metatze-mugak gainditzen ez badira, ez eta 5/2005 Foru Arauaren 18.3 artikuluan ezarritakoa ere.
2. Bizkaiko Foru Aldundiko Ekonomia Sustatzeko Sailaren beste plan, programa edo jarduera-arlo batek diruz lagundutako gastuek ezin izango dute dirulaguntza jaso.
3. Nolanahi ere, dirulaguntzak jasotzen dituzten erakundeek Ekonomia Sustatzeko Sailari era frogagarrian jakinarazi beharko diote beste dirulaguntzarik jaso duten, egun batean edo bestean eman. Hala balego, horrekin batera egin den diru itzulketako gutunaren kopia bidaliko da. Horrek guztiak hala behar du, 5/2005 Foru Arauaren 18.3 eta 4. artikuluetan aurreikusitako ondorioetarako. Horrela, beraz, beste dirulaguntzen edo laguntza ekonomikoen zenbatekoak zenbatetsi eta, proiektua finantzatzeko ehuneko mantentze aldera, dirulaguntza esleitzeko ebazpena aldatu ahal izango da. Jakinarazpen hau jakin eta berehala egin beharko da eta, edozein kasutan, jasotako funtsen erabilera justifikatu baino lehen.
4. Ekonomia Sustatzeko Saila beste finantzatzaileekin harremanetan jarri ahalko da baterako finantzaketa adosteko.

## II. KAPITULUA

**APLIKATU BEHARREKO ARAUDIA ETA ANTOLAKETA-XEDAPENAK****13. oinarria. — Ezarri beharreko arautegi orokorra**

1. Foru dekretu honetan aipatutako dirulaguntzei dagokienez, aginduzkoak izango dira foru dekretu honetako xedapenak, laguntzak emateko foru aginduetan ezartzen diren gainerako baldintzak, 5/2005 Foru Arauaren xedapenak eta Dirulaguntzen Erregelamendua, eta estatuko edo erkidegoko gainerako arau aplikagarriak.



2. Era berean, 651/2014 (EE) Araudi eta, osagarri gisa, 39/2015 Legea ere erabiliko dira.

3. Interesdunak ematen dituen datuak foru dekretu honetatik eratorzen diren prozedurak kudeatzeko erabiliko dira, kontuan harturik zer ezartzen den honako araudi honetan: 2016/679 Erregelamendua (EB), 2016ko apirilaren 27koa, Europako Parlamentuarena eta Kontseiluarena, datu pertsonalen tratamenduari eta datu horien zirkulazio askeari dagokienez pertsona fisikoak babesteari buruzkoa eta Datu Pertsonalen Babesari eta Eskubide Digitalen Bermeari buruzko abenduaren 5eko 3/2018 Lege Organikoan (aurrerantzean 3/2018 Lege Organikoan). Datu horiek inola ere ez dira erabiliko, eta ez zaizkie hirugarren batzuei lagako, interesdunak argi eta garbi ados dagoela adierazi ezean edo goian aipaturiko araudian ezartzen diren kasuetan izan ezik. Araudi horretan xedatzen dena betetzeko, interesdunak honako eskubide hauek baliatu ahal izango ditu datuen tratamenduaren arduradunaren aurrean: datuak eskuratzeko, zuzentzeko, ezereztzeko («ahaztua izateko eskubidea»), haien tratamendua mugatzeko eta datuok eramangarri izateko eskubideak, bai eta tratamendu automatizatuan soilik oinarrituriko erabakirik ez jasatekoa (barne harturik profilen sorrera), baldin eta erabakiak eragin juridikoak badakarzkio edo, modu bertsuan, beragan eragin nabarmenik badu. Era berean, edozein momentutan erreboka dezake lehen adierazitako onarpena. Informazio gehiagorako eta eskubide horiek baliatzeko, Bizkaiko Foru Aldundiaren webgunean kontsulta daiteke datu pertsonalen babesari buruzko atala (<https://web.bizkaia.eus/eu/datuen-babesa>). Halaber izango du eskubidea erreklamazioa aurkezteko Datuen Babesaren Kontrol Agintaritzaren aurrean.

#### **14. oinarria.— Laguntzak emateko prozedura antolatu, aztertu eta ebatziko duten organo eskudunak**

1. Dirulaguntzetarako eskaerak Berrikuntza Zerbitzuak izapidetuko ditu, eta, eskaerok ebazteko, Ekonomia Sustatzeko Saileko arduradunak esanbidezko ebazpena eman go du, Ekintzaitza eta Enpresen Lehiakortasuna Bultzatzeko Zuzendaritza Nagusiak hala proposaturik.

2. Emakida prozedura antolatzeko, bideratzeko eta ebazteko organo eskudunak osatzerako orduan, kontuan hartu beharko da bi sexuen artean ordezkaritza ordezkaturata dagoela; horrek esan nahi du bi sexuek ordezkariaren bat eduki beharko dutela, 4/2005 Legearen 20. artikuluan eta 4/2018 Foru Arauaren 44. artikuluan aurreikusitakoari jarraiki.

#### **15. oinarria.— Erakunde laguntzaileak**

1. Ekonomia Sustatzeko Sailak berari atxikitako foru sozietate publiko batzuen laguntza du bere helburuak lortzeko. BEAZ, S.A.U. da sozietate horietako bat. Sozietate horrek dirulaguntza egitarauan esku hartuko du, erakunde laguntzaile gisa, Bizkaiko Foru Aldundiarekin sinatutako lankidetzaren hitzarmenean ezarritakoaren arabera.

2. BEAZ, S.A.U. erakunde laguntzaileak Bizkaiko Foru Aldundiko Ekonomia Sustatzeko Sailaren izenean eta kontura jardungo du; sail hori izango da, ondorio guztietarako, foru dekretu honetan ezarritako laguntzen emalea.

### III. KAPITULUA

#### PROZEDURAZKO XEDAPENAK

##### 1. ATALA

##### XEDAPEN ESPEZIFIKOAK

#### **16. oinarria.— Eskabideak aurkezteko epea**

Eskabideak aurkezteko epea 2021eko irailaren 13an hasiko da, eta 2021eko urriaren 1eko 13:30ean amaituko da.



**17. oinarria. — Gehienez aurkez daitezkeen eskabideak**

1. Lansaio osokoak urteko kopuru baliokideetan 50 langile baina gutxiago duen erakunde bakoitzak, eskabide bat (1) aurkeztu ahal izango ditu, gehienez. Lansaio osokoak urteko kopuru baliokideetan 50 langile edo gehiago duen erakunde bakoitzak, eskabide bi (2) aurkeztu ahal izango ditu, gehienez.

2. Langiletzat joko dira lan-kontratu baten bidez enpresari lotuta dauden pertsonak, Gizarte Segurantzaren Erregimen Orokorrean sartuta badaude. Halaber, langiletzat joko dira lan elkartuko kooperatibetako bazkide langileak, Gizarte Segurantzako Araubide Orokorrean sartuta ez badaude ere. Seme-alabak edo mendetasuna duten pertsonak zaintzeagatik lansaioa murrizten den kasuetan, erakunde eskatzailearen beraren eskariz, murrizketa kontuan hartu gabe konputatu ahal izango dira lansaio horiek.

3. Erakunde batek baimendutako gehieneko eskaera-kopurua baino gehiago aurkezten badu organo inbentarioak jakinarazi egingo dio eta 10 eguneko epea emango dio eskaeretako batzuei uko egiteko, bere nahierara. Berariazko erantzunik jaso ezean, baimendutako eskaera kopurua soilik hartuko da kontuan, eta horretarako, eskaerak sarrera erregistroan duten zenbakia hartuko da aintzat.

**18. oinarria. — Eskabidean aurkeztu beharreko agiriak**

1. Laguntza egitarau honen onurei heldu nahi dieten enpresek oinarria honetan jasotako agiriak bidali behar dizkiote Ekonomia Sustatzeko Sailari.

2. Eskabidearekin batera aurkeztu beharreko agiriak:

a) Eskabide telematikoa, 23. oinarrian ezarritakoaren arabera.

b) Ekonomia Sustatzeko Sailaren web gunean eta bulegoetan eskura daitezkeen ereduaren arabeko eskabidea.

c) Eskuragarri dagoen Langile Izendun Zerrenda RNT (aitzineko TC2a) berriena. Gizarte Segurantzako Araubide Orokorrean sartuta ez dauden lan elkartuko kooperatibetako bazkide langileen kasuan, dokumentazio baliokidea.

d) Enpresak baldin badauzka, indarrean dauden ziurtapenak eta/edo planak, genero ikuspegi, ingurumen, euskararen sustapen eta enpresa erantzukizun sozialakoak, bai eta erakunde publiko eskudunek emandako aintzatespenak eta diplomak ere.

e) Hartzekodunaren fitxa, Bizkaiko Foru Aldundiko webgunean dagoen eredu ofiziala, Bizkaiko Foru Aldundian banku-helbideratzeari buruzko datuak ez badaude edo dauden datuak aldatu nahi badira. Dokumentazio osoa dagoela jotzen den data zehazterakoan ez da kontuan hartuko hartzekodunaren fitxa, espedientearen ebazpena emateko ondorioetarako.

3. Proiektua baloratzeko ondokoak hartuko dira kontuan jasotako agiriak eta proiektuan parte hartuko duten enpresako pertsonekin egindako elkarrizketan bildutako informazioa.

**19. oinarria. — Justifikatzeko epea**

1. Dekretu honen babesean garatutako proiektuak justifikatzeko epea laguntza onartu eta hurrengo egunean hasiko da, eta epemuga 2023ko uztailaren 31 izango da, egun hori barne.

2. Dirulaguntzen onuradun diren erakundeek, dirulaguntzaren azken justifikazioaz gainera, bitarteko justifikazio bakarra aurkeztu dezakete, 2022ko uztailaren 31 baino lehen (egun hori barne).

3. Salbuespen gisa 10 eta 38.6 oinarrietan jasotako baldintzetan, enpresa onuradunak proiektua egiteko eta/edo justifikatzeko epea luzatzeko eskatu ahal izango du.

**20. oinarria. — Justifikatzeko modua eta dokumentazioa**

1. Gastu agirieko egiaztapen-kontuaren sistemaren bidez egin beharko da dirulaguntzaren justifikazioa eta horretarako agiri hauek aurkeztu beharko dira:





2. Dirulaguntza egiaztatzeko aurkeztu beharko diren agiriak:
  - a) Justifikazio telematikoa, 39. oinarrian zehaztutakoaren arabera.
  - b) Justifikazioaren txostena, webean eta Ekonomia Sustatzeko Saileko bulegoetan eskuragarri dagoen ereduaren arabera.
  - c) Eskuragarri dagoen Langile Izendun Zerrenda RNT (aitzineko TC2a) berriena. Gizarte Segurantzako Araubide Orokorrean sartuta ez dauden lan elkartuko kooperatibetako bazkide langileen kasuan, dokumentazio baliokidea.
  - d) Legezko baldintzak betetzen dituzten gastuen fakturak. Beste herri batzuetako fakturekin batera itzulpena aurkeztu beharko da, ingelesez eginda daudenak izan ezik.
  - e) Fakturen ordainketen frogagiriak. Ez da onartuko eskura ordaintzea.
  - f) 37. oinarrian eskatzen diren hiru eskaintzak edo ordeztu agiriak.
  - g) Trenen eta materialaren amortizazioaren ziozko kostuak egotziz gero, eskuratzeko-kostua, amortizazio-sistema eta proiektua gauzatu bitartean zer ehunekotan erabili diren jasotzen dituen adierazpena, eta ikuskatutako urteko azken kontuen liburu nagusiaren laburpena, urtekoari egotzitako zenbatekoa erakusten duena.
  - h) Laguntzaren publizitate egokia egiaztatzen duen dokumentazio grafikoa, 22. oinarrian adierazitakoaren arabera.
  - i) Dirulaguntza emateko ebazpenean beren-beregi aurkezteko eskatu dena.

3. Proiektua justifikatzeko unean ikusten bada 9. oinarrian jasotako kostu-kategoriako batean onartutako guztizko zenbateko onargarria txikiagoa dela dirulaguntza kalkulatzeko onartutako zenbatekoa baino, goranzko desbideratzeen bidez konpentsatu ahal izango da beste kategoria batzuetan, gehienez ere kategoria bakoitzean esleitutako zenbatekoa %20 handituta, betiere behar bezala justifikatuta badago, eta ez bada 9. oinarrian ezarri den kostu-kategoria eta motengatiko gehieneko dirulaguntza gainditzen. Kostu-kategoria bakoitzari dagozkion ehunekoen arabera kalkulaturako guztizko dirulaguntza justifikatuaren zenbatekoak emandako dirulaguntzaren berdina edo handiagoa izan beharko du. Bestela, ez-betetzearen prozedura izapidetuko da.

4. Dena dela, Ekonomia Sustatzeko Sailak enpresa eskatzaileari beharrezkotzat jotzen dituen agiri edota informazio osagarriak eskatu ahal izango dizkio, aurkeztutako eskabidea ondo ulertu eta ebaluatzeko eta beraren jarraipena egin ahal izateko. Era berean, Ekonomia Sustatzeko Sailak erakunde eskatzaileari bisitak eskatu ahal izango dizkio proiektua egin bitartean eta amaitu ondoren, jarraipen egokia egiteko.

5. Ekonomia Sustatzeko Sailaren jardueraren eragina ebaluatzeko, sail horrek enpresari proiektuak iraun bitartean zein proiektu amaitu eta osteko urteetan enpresaren bilakaera adierazten duten adierazle ekonomikoak eta enpleguari buruzko adierazleak nahiz proiektuak enpresan izandako eraginari buruzkoak aurkezteko eskatu ahal izango dio. Adierazle horiek aurkezteko epea, eskatzen zaizkion unean zehaztuko da.

#### **21. oinarria. – Dirulaguntza ordaintzea**

1. Proiektua gauzatzeko gastuei dagozkien dirulaguntzak (kanpo-gastuak, inbertsioak eta langileen barne-gastuak) BEAZ SAUren bidez emango dira. Ordainketak proiektua gauzatzearen arabera egingo dira, justifikazio partzialak edo osoa jaso ondoren. Gehienez ere bi (2) ordainketa egingo dira.

2. Dirulaguntzaren azken justifikazioari dagokionez, emandako zenbatekoak BEAZ, S.A.U. sozietateri aurretiaz ordainduko zaizkio, ez sozietate horri ez erakunde onuradunei bermerik eskatu gabe.

3. Erakunde onuradunei egiten zaizkien ordainketak diruz lagun daitezkeen gastuztat jotzen diren justifikatutako gastuen proportzionalak izango dira, urteko bakoitzean ematen diren kopuruak gorabehera. Kopuru hori aldi bakoitzean eman dena baino txikiagoa izan daiteke, eta, hala badagokio, egindako gastuaren proportzionala den dirulaguntzaren azken doikuntza egin behar da.



4. BEAZ, S.A.U erakunde laguntzaileari ordaintzeko, bai eta erakunde laguntzaile horrek erakunde onuradunari ordaintzeko ere, erakunde onuradunak zerga-betebeharrak eta Gizarte Segurantzarekikoak egunean izan beharko ditu. Bestela, itzultzeko edo kobratzeko eskubidea galtzeko eskatuko da, 5/2005 Foru Arauaren 38. artikuluan ezarritako prozedurari jarraikiz.

## **22. oinarria.— Laguntzaren publizitatea**

1. Foru dekretu honen babesean emandako laguntzen onuradun diren eskabideek, diruz lagundutako jarduerak hedatzeko ekintza guztietan, Bizkaiko Foru Aldunditik jasotako laguntzaren berri eman beharko dute, dirulaguntzei buruzko 5/2005 Foru Arauaren 17.3 artikuluan adierazitakoarekin bat etorritik, bai eta EGEFek lagundutako finantzaketaren berri ere, 1303/2013 (EB) Erregelamenduaren XII. eranskinaren 2.2 atala aplikatuz.

2. Proiektuaren finantzaketaren izaera publikoaren publizitate egokia, euskarri informatikoetan zein bestelakoetan, honako adierazpen hau sartzera mugatu beharko da: «Bizkaiko Foru Aldundiak finantzatu du proiektu hau, 2021eko Teknologia Transferentzia Programaren barruan eta FEDER funtsaren kofinantziazioa ere badauka / Este proyecto ha sido financiado por la Diputación Foral de Bizkaia dentro del Programa Transferencia Tecnológica 2021 y cuenta con cofinanciación del FEDER». Bizkaiko Foru Aldundiaren eta Europar Batasunaren ikur ofizialak ere izango ditu. Berariaz debekatuta dago Bizkaiko Foru Aldundia aipatzen duen beste edozein legenda edo irudi erabiltzea.

3. Erakunde onuradunek kartel bat jarriko dute proiektuari buruzko informazioarekin (gutxienez A3 tamainakoa). Kartel horretan, jasotako laguntza aipatuko dute, jendeak ikusteko moduko leku batean. Era berean, aktibo materialak (instalazioak, makinak, ekipak...) finantzatzuz gero, jasotako laguntza aipatzen duen kartel edo itsasgarri bat jarriko da aktibo bakoitzean.

4. Hizkuntza ofizialak erabiltzeko irizpideak ezartzen dituen Bizkaiko Foru Aldundiaren maiatzaren 28ko 63/2019 Foru Dekretuaren 13.3 eta 13.4. artikuluetan ezarritakoaren arabera, dirulaguntza jasotzen duten erakundeek euskara erabili beharko dute diruz lagundutako jardueraren ondoriozko esku-hartze publiko guztietan. Era berean, pertsona edo erakunde onuradunek beren jardueraren berri herritarrei emateko erabiltzen dituzten liburuxka, kartel edo bestelako euskarri guztietan bi hizkuntza ofizialak erabili beharko dira.

5. Bizkaiko Gardentasunari buruzko otsailaren 17ko 1/2016 Foru Arauaren 2. artikuluen arabera, arau horren 8., 9. eta 10. artikuluetan jasotako gardentasun- eta publizitate-betebeharrak aplikatuko zaizkie aurrekontuko ekitaldi batean gutxienez 100.000 euroko laguntza edo dirulaguntzak jasotzen dituzten erakunde pribatuei, edo urteko diru-sarreraren guztien %40k Foru laguntza edo dirulaguntza publikoaren izaera dutenean, baldin eta gutxienez 5.000 badira.

## 2. ATALA

### ESKABIDEEN INSTRUKZIOA ETA EBAZPENA

## **23. oinarria.— Eskabideak nola aurkeztu**

1. Eskabidea, behar bezala eta oso-osorik beteta, Internet bidez aurkeztu behar da. Horretarako, Bizkaiko Foru Aldundiko web orrian ([www.bizkaia.eus](http://www.bizkaia.eus)), Ekonomia Sustatzeko Sailaren bulego birtualari dagokion atala erabili behar da.

2. Horrela bada, eskabideak bide telematikoetatik aurkeztu behar direnez, enpresa interesdunek aldeztu aurretik sinadura elektronikoa izan beharko dute (izenpe, NAN elektronikoa, FEA...), edo B@kQ ziurtagiri elektronikoa. Azken hau eskatu ahal izango da Ekonomia Sustatzeko Sailean (Orueta Apezpikua kalea, 6., Bilbo). Alta prozeduraren gaineko informazioa eskuragarri dago aipatutako Ekonomia Sustatzeko Sailaren bulego birtualari dagokion atalean.



3. Eskabidea aurkezteko ezinbestekoa izango da erakundea Ekonomia Sustatzeko Sailaren erakundeen eta pertsona fisikoen erregistroan alta emanda egotea (106/2016 Foru Dekretua, ekainaren 14koa; Bizkaiko Aldizkari Ofizialean 116 zk., 2016.ko ekainaren 17koa). Egoera horretan ez badago, erakundeak inskribatzeko eskaera bete behar du, dirulaguntza eskabidea izapidetu baino lehen.

4. Ekonomia Sustatzeko Sailaren erakundeen eta pertsona fisikoen erregistroko datuak bete ondoren, Bizkaiko Foru Aldundiaren egoitza elektronikora eramango dira automatikoki, behar diren jakinarazpen elektronikokoak egiteko, 32. oinarrian ezarritakoaren arabera.

5. Nolanahi ere, instrukzioaz arduratzen den organoak elkarrekin zerikusia duten eskabideak taldekatu edo banakatu ditzake, eskabideok ondo aztertu eta ebaluatzeko eta dirulaguntzaren xedeko jarduerara ondoen egokitzen den egitate lagungarria zehazteko neurri egokia dela irizten badio.

6. Eskatzaileak, dirulaguntzarako eskabidea aurkeztean, baimena ematen dio organo instruktoreari, onuraduna izateko baldintzen inguruabarren egiaztapena zuzenean lor dezan; hori, Dirulaguntzen Erregelamenduaren 17.1. artikuluan eta 3/2018 Lege Organikoan xedatutakoarekin bat etorritik, telematikako ziurtagiri egokien bidez egin daiteke.

7. Eskabideekin batera 18. oinarrian ezarritako agiriak aurkeztu beharko dira; ares-tian aipatu bulego birtualean agiriak eransteko dagoen sistema erabiliko da.

#### **24. oinarria. — Txostenaren instrukzioa**

1. Eskabideen espedienteak honelaxe izapidetuko dira:

- a) Instrukzioaz arduratzen den organoak ezarri diren eta pertsona edo erakunde onuradun gertatzeko ezinbestekoak diren baldintzak betetzen direla egiaztatuko du.
- b) Eskabideak behar bezala beterik ez badaude edo deialdietan aipaturiko agiriak erantsita ez badituzte, eskabidea aurkeztu duen enpresari agindeia egingo zaio instrukzioaz arduratzen den organoak jakinarazpena egin eta biharamunetik zenbatzen hasiko den hamar (10) asteguneko epean akatsa konpon dezan edo behar diren agiriak aurkez ditzan; eta ohartaraziko zaio, hori egiten ez badu, eskaera bertan behera utzi duela uste izango dela berariaz emango den ebazpenaren bitartez, 39/2015 Legearen 21. eta 68. artikuluetan xedatutakoaren arabera.

Nolanahi ere, organo instruktoreak aurkeztu diren eskabideak behar bezala ulertu eta ebaluatzeko beharrezkotzat hartzen dituen agiri edota argibide guztiak eskatu ahal izango dizkie eskabidea aurkeztu duten erakunde eskatzaileei.

#### **25. oinarria. — Eskabideen ebaluazioa**

Eskabideak ebaluatuko dituen erakundeak behin betiko ebazpen proposamena egingo du. Proposamen horrek ez die inolako eskubiderik emango proposamen horretan bertan onuradun ageri diren pertsonaei edo erakundeei.

#### **26. oinarria. — Ebazpen proposamena**

1. Ebaluazioa egindakoan organo instruktoreak egiaztatuko du eskaera egin duen pertsonak edo erakundeak Gizarte Segurantzarekiko betebeharrak egunean dituela, baina aurretik eskabidea egin behar zaio Gizarte Segurantzaren Diruzaintza Nagusiari. Halaber, pertsona edo entitate eskatzailearen zerga egoeraren egiaztagiria eskatuko dio Ogasun eta Finantza Sailari.

2. Behin egiaztatuta, instrukzioaz arduratzen den organoak Ekintzailtza eta Enpresen Lehiakortasuna Bultzatzeko Zuzendaritza Nagusiari ebazpen proposamena igorriko dio.

#### **27. oinarria. — Aurrekontuaren muga**

Aurreko oinarrian aipatutakoarekin bat etorritik, aurkeztutako eskabide guztietatik aurrekontu-partidan aurrekontuek ahalbidetzen dituzten bezain beste hautatuko dira.

**28. oinarria. — Ebazteko epea**

1. Foru dekretu honen itzalpean aurkezten diren eskabideak ebazteko eta jakinarazteko gehieneko epealdia sei (6) hilabetekoa izango da deialdi bakoitzeko eskaerak aurkezteko epea amaitzen denetik.

2. Organo eskudunak, nolana ere, aurkeztutako eskabide guztientzako ebazpena eman behar du nahitaez. Ebazpenerako eta jakinarazpenerako epea amaitu bada eta aipatutako organoak ebazpena eman ez badu, administrazio-isiltasunaren ondorioz eskabideari gaitz iritzi zaiola ulertuko da, horrela xedatzen 39/2015 Legearen 25. artikuluan.

**29. oinarria. — Ebazpena**

1. Ekintzailtza eta Enpresen Lehiakortasuna Bultzatzeko Zuzendaritza Nagusiak Ekonomia Sustatzeko foru diputatuari igorriko dio ebazpen proposamena, eta hark ebaztuko du dagokion foru aginduaren bidez.

2. Lehia erregimenean emango diren laguntzei dagozkien ebazpenak onartutako eta ukatutako laguntzak ekarriko ditu. Horrez gain, pertsona edo erakunde onuradun izateko foru dekretu honetan ezarri diren baldintza administratiboak eta teknikoak betetzen dituzten, baina deialdiari dagokion kredituaren gehieneko zenbatekoa gainditu izanagatik onartu ezin izan diren eskabideak ere ekarriko ditu. Aurreikusitako balorazio-irizpideen arabera, eskaera bakoitzari esleitutako puntu-kopurua adieraziko da.

3. Dirulaguntza ematen duen ebazpenean baldintza bereziak ezarri ahalko dira, foru dekretu honetan edo dagokion deialdian xedatutakoa proiektuen izaera bereziari edo bestelako inguruabarrei egokitze aldera beharrezkoa irizten bazaio.

4. Ebazpena interesdunei jakinaraziko zaie, 39/2015 Legearen 40. eta hurrengo artikuluetan ezarritakoa betez.

5. Ebazpenaren jakinarazpena jaso ondoren, onuradun gertatu den pertsonak edo erakundeak hamar (10) laneguneko epea du —jakinarazpena jaso eta hurrengo egunetik zenbatzen hasita— baiezkotzeko emateko. Epe hori amaitu eta interesdunek ez badute ezer adierazi, ebazpena onartu dela ulertuko da.

**30. oinarria. — Errekurtsoak**

1. Ebazpenak administrazio bidea agortzen du. Beraren aurka berraztertze errekurtsoa jarri ahal izango da, Ekonomia Sustatzeko Saileko titularrari ebazpena jakinarazi eta hurrengo egunetik hilabete (1) pasatu baino lehen, 39/2015 Legearen ezarritakoarekin bat etorritz.

2. Halaber, Administrazioarekiko auzi-errekurtsoa aurkeztu ahal izango da txandaka dagokion Bilboko Administrazioarekiko Auzien Epaitegian jakinarazpena jaso eta hurrengo egunetik bi (2) hilabete pasatu baino lehen, Administrazioarekiko auzien jurisdikzioa araupetu duen uztailaren 13ko 29/1998 Legearen xedatutakoarekin bat etorritz. Ezin dira bi errekurtso horiek aldi berean jarri.

**31. oinarria. — Dirulaguntzari uko egitea**

1. Pertsona edo onuradunen batek dirulaguntzari uko eginez gero eta aurrekontu-zuzkidura hainbanatu bada, organo emaileak erabaki ahal izango du gainerako adjudikaziodunei dirulaguntzaren ehunekoa gehitzea aurrekontu-zuzkidura agortu arte, baina ezarritako dirulaguntzaren gehieneko ehunekoa gainditu gabe.

2. Dirulaguntza ematen duen organoak aukera horren berri emango die interesdunei, hamar (10) eguneko epean dirulaguntza proposamena onets dezaten. Epe hori, gainera, ezin izango da luzatu. Dirulaguntza eskatu duen pertsona edo erakundeek proposamena onartzen dutenean, administrazio-organok laguntza emateko egintza ezarri eta jakinarazpenak egingo ditu.

3. Uko egitea aurkezteko gehieneko epea hamar (10) laneguneko izango da, erakunde interesdunari dirulaguntza proposamena jakinarazten zaionetik hasita. Epe hori igaro ondoren, uko egitea dirulaguntza emateko arrazoi izan diren baldintzak ez-betetzea dela joko da.

**32 oinarria. — Jakinarazpen elektronikoa**

1. Ekonomia Sustatzeko Sailak interesdunei jakinarazpenak egitean, bide elektronikoa erabili beharko ditu, 39/2015 Legearen 40. eta hurrengo artikuluen arabera.

2. Bitarteko elektronikoen bidez egiten diren jakinarazpenak Bizkaiko Foru Aldundiaren egoitza elektronikoa (<https://www.ebizkaia.eus>) bertaratuz egin beharko dira, Administrazio Elektronikoa buruzko Bizkaiko Foru Aldundiaren maiatzaren 5eko 62/2015 Foru Dekretuaren arabera, eta Herri Administrazioa eta Erakunde Harremanetarako foru diputatuaren ekainaren 6ko 4841/2016 Foru Aginduaren arabera (foru agindu hori jakinarazpenak eta komunikazioak Bizkaiko Foru Aldundiaren egoitza elektronikoa eragartzeko sistemaren bidez egiteari buruzkoa da).

**33. oinarria. — Dirulaguntzen argitaratzea**

1. Dirulaguntzak ematen diren urte naturala amaitu ondorengo lehen hiru hilabeteak bukatu aurretik, ebazpenaren laburpen bat argitaratuko da Bizkaiko Aldizkari Ofizialean.

2. FEDER Eskualde Garapenerako Europako Funtsaren arautegiari jarraituz, foru dekretu honetako laguntzak onartzeak berekin dakar datuak zerrenda publiko batean sartzea: alegia, Euskal Autonomia Erkidegoko FEDER 2014-2020 programa eragilearen eragiketen zerrendan.

3. 651/2014 (EE) Araudi Orokorraren 9. eta 11. artikuluei jarraituz, dekretu honetako laguntzak onartzeak berekin dakar datuak estatuko laguntzen datu basean sartzea.

**3. ATALA****DIRULAGUNTZEN KUDEAKETA ETA EGIAZTAPENARI BURUZKO XEDAPENAK****34. oinarria. — Dirulaguntza jaso dezaketen gastuetarako irizpide orokorrak**

1. Honako hauek dira dirulaguntza jaso dezaketen gastuak: indarrean dagoen araudiaren arabera behar bezala justifikatu direnak, betiere epearen barruan egin badira, beharrezkoak badira eta proiektuaren edo jardueraren izaerari eta garapen normalari erantzuten badiete.

2. Dirulaguntza jaso dezaketen gastuen kostuak ez dira onartuko baldin eta merkaturatu duten balioa baino handiagoak badira.

3. Edonola ere, honako gastu hauek ez dute dirulaguntzarik jasoko:

a) Dirulaguntzaren xedea den jarduerarekin inolako inola ere identifikatu ezin diren gastuak edo/eta deialdi bakoitzerako epearen barruan egiten ez direnak.

b) Eskatzailearen eta hornitzailearen artean lotura dagoela erakusten duten gastuak. Ondorio horietarako, joko da lotura dagoela Sozietateen Gaineko Zergari buruzko abenduaren 5eko 11/2013 Foru Arauaren 42.3 artikulua eta Merkataritzako Kodearen 42-49 artikuluek ezarritako kasuetan.

4. Erakunde onuradunak gastuak diruz laguntzeko modukotzat jo ahal izateko kontabilitateko erregistro bat eraman beharko du, diruz lagundutako proiektuari dagozkion diru-sarrerak eta gastuak bereiz identifikatu ahal izateko, dela kontabilitateko sistema berezi baten bidez, dela proiektuarekin lotutako transakzio guztietarako kontabilitateko kode egoki bat esleituz, 1303/2013 (EB) Erregelamenduaren 125.4. artikuluan ezarritakoarekin bat etorritik.

**35. oinarria. — Gastuen egokitzapena**

Ekonomia Sustatzeko Sailak uste badu gastuen aurrekontua antzeko gastuen batez besteko kostuarekin alderatu eta gehiegizkoa dela, dirulaguntzaren oinarria murriztu ahal izango du, gastuentzako zenbateko egoki eta proportzionalera arte.

**36. oinarria. — Azpikontratazioa**

1. Pertsona edo erakunde onuradun batek azpikontratazioa egin duela ulertuko da dirulaguntzaren xedea den jarduera zati batez edo osorik egitea beste norbaitekin kontratatzen duenean. Kontzeptu honetatik kanpo geratuko da pertsona edo erakunde onuradunak berak bakarrik diruz lagundutako jarduera egiteko dauzkan gastuak kontratatzea. Ondorioz, makinak, ekipamendua eta material suntsigarriak erostea, diruz lagundutako jardueraren barruan lan zehatzak egiteko kanpoko zerbitzuak kontratatzea, eta diruz laguntzen den jardueraren beste gastu osagarri batzuk egitea ez da azpikontratazioztat joko.

2. Diruz laguntzen diren zerbitzu edo proiektuetako jardueren %50eraino azpikontratatu ahalko da, baldin eta 5/2005 Foru Arauaren 27. artikuluan eta Dirulaguntzen Erregelamenduko 53. artikuluan ezarritako baldintzak eta debekuak errespetatzen badira.

3. Dirulaguntzaren xedea gauzatzea agintzen zaien erakundeek, 4/2005 Legean eta 4/2018 Foru Arauan aurreikusitakoaren arabera, bertan ezarritako printzipio orokorrak eta 4/2018 Foru Arauaren 46. artikuluan jasotako betebeharrak errespetatu beharko dituzte.

4. Dirulaguntzaren erakunde onuradunak dirulaguntzari dagokion jardueraren zati bat hirugarrenekin ituntzen ditueanean, jarduera dirulaguntzaren zenbatekoaren %20 baino gehiago bada eta, gainera, azpikontratazioaren prezioa 60.000 euro baino gehiagokoa bada, erakunde onuradunak Bizkaiko Foru Aldundiari eskatu beharko dio azpikontratazio hori egin ahal izatea; horretarako, haren baldintza nagusiak eta zein erakunderekin itundu den jarduera burutzea adierazi beharko dira. Ekintzailatza eta Enpresen Lehiakortasuna Bultzatzeko Zuzendaritza Nagusiak ebatziko du eskabidea, hamabost (15) eguneko epean. Epe horretan berariazko ebazpenik eman ezean eskabideari ezetsi zaiola pentsatuko da.

**37. oinarria. — Eskaintza aukeratzea**

1. Dirulaguntza jaso dezakeen gastuaren zenbatekoa azaroaren 8ko 9/2017 Sektore Publikoko Kontratuei buruzko Legean kontratuak txikitat hartzeko finkatzen diren zenbatekoa (40.000 eurotik beherakoa, obra-kontratuak badira eta 15.000 eurotik beherakoa, hornitze- edo zerbitzu-kontratuak badira) baino gehiagokoa bada, pertsona onuradunak hiru hornitzailearen eskaintzak eskatu beharko ditu gutxienez, zerbitzua egiteko edo ondasuna emateko konpromisoa hartu baino lehen. Hori ez da beharrezkoa izango baldin eta, dirulaguntza jaso dezaketen gastuen ezaugarri bereziengatik, merkatuan ondasun eta zerbitzuok hornitu edo egiten dituen hainbeste entitaterik ez badago, edo gastua dirulaguntza eskatu baino lehen egin bada.

2. Aurkeztutako eskaintzak egiaztagirian edo, egotekotan, dirulaguntzaren eskaeran aurkeztu behar dira. Eskaintza horien arteko aukeraketa eraginkortasun eta ekonomi irizpideen arabera egingo da. Proposamenik merkeena ez baldin bada aukeratzeko, zergatia memoria batean berariaz bidezkotu behar da.

**38. oinarria. — Jarraipena**

1. Foru dekretu honetan aurreikusten diren dirulaguntzak eskuratuko dituzten pertsonak edo erakundeek lagunduko diren jarduerak gauzatu direla eta dirulaguntza jasotzeko baldintzak betetzen dituztela agiri bidez frogatu beharko dute. Hori guztia egin beharko dute foru dekretu honetan, dagokion deialdian nahiz esleipena dakarren foru aginduan aurreikusten den moduan eta Ekonomia Sustatzeko Sailak nahiz, kasuan kasu, dagokion erakunde laguntzaileak eskatzen duen unean frogatu beharko dira.

2. Zehazki dirulaguntzaren onuradun diren pertsona edo erakundeek, 4/2005 Legean eta 4/2018 Foru Arauan aurreikusitakoarekin bat etorriz, horietan ezarritako printzipio orokorrak errespetatu beharko dituzte.

3. Justifikazioa ez bada ezarritako epean aurkeztzen, dirulaguntza itzultzeko eskatuko da, eta 5/2005 Foru Arauan ezarritako gainerako erantzukizunak ere eskatuko dira. Kasu horietan, onuradun gertatu den pertsonak edo erakundeak jaso duen eta frogatu ez duen diru-kopurua bueltatu beharko du, baita dagokion berandutze-interesa ere.





4. Dirulaguntza ematen duen organoak emate-erabakia ofizioz aldatu ahal izango du funtsak aplikatu aurretik eta interesdunak esan beharrekoa entzun ondoren. Erabakia ofizioz aldatu ahal izango da dirulaguntza emateko betekizunetako bat aldatu egin bada eta, ondorioz, xedetzat hartu izan den interes publikoa bete ezin bada edo betetzeko zailtasunak izan baditu eta, bide batez, onuradun gertatu den pertsonari edo erakundeari kalte ekonomikoak eragin ez bazaizkio.

5. Organo instruktoreak entzunaldien egutegia ezar dezake Egitaraura aurkeztu diren proiektuen organo instruktorearen aurrean nahi izanez gero azalpenak aurkezteko.

6. Onuradun gertatu diren pertsonak edo erakundeek, halaber, laguntza ematen duen erakundeari dirulaguntzak emateko ebazpena aldatzeko eska diezaiokeete diruz lagundutako jarduera gauzatzeko epea amaitu aurretik, betiere aipatu berri dugun aldatetaren bidez aldeztu aurretik ezarritako epeak luzatu nahi badira, emandako dirulaguntzaren zenbatekoa murriztu nahi bada edo jardueraren barne dauden egintzak aldatu nahi badira. Eskaera horiek baimena jasoko dute aurretik ikusi ez diren baldintzak gertatzen badira, betiere dirulaguntzaren xedea aldatzen ez bada eta hirugarren pertsonen eskubideak urratzen ez badira.

7. Epeen luzapena 39/2015 Legearen 32. artikuluan ezartzen duenaren arabera egingo da. Beraz, epeak luzatzeko eskaera eta erabakia dagokien epea bukatu baino lehen egin beharko dira eta luzapena ezingo da hasieran ezarritako epearen erdia baino handiagoa izan. Era berean, epeen luzapena emateko edo ukatzeko ebazpenak ezingo zaie helegitea jarri, beti ere prozedura amaitzen duen ebazpenari jar dakiokiena ez bada.

8. Halaber, Ekonomia Sustatzeko Sailak eskatu ahal izango dizkio Programaren emaitzak egoki ebaluatzeko beharrezkotzat jotzen dituen agiri edota informazio osagarriak entitate onuradunari lagundutako proiektuaren amaieratik eta hurrengo hiru urteetan.

### **39. oinarria. — *Justifikatzeko modua***

1. Dirulaguntzak ezarritako agiriak aurkeztuz justifikatu behar dira.
2. Justifikazioa Internet bidez aurkeztu behar da, atal guztiak behar bezala beteta. Horretarako, galdetegi bat bete behar da, Bizkaiko Foru Aldundiko web orrian ([www.bizkaia.eus](http://www.bizkaia.eus)), Ekonomia Sustatzeko Sailaren bulego birtualari dagokion atalean.
3. Justifikazioa egiteko epea igarota, ez bada justifikaziorik aurkeztu organo instrukzio-egilearen aurrean, organoak erakunde onuradunari eskatuko dio hamabost (15) eguneko epean aurkez dezala. Epe hori ezingo da luzatu. Justifikazioa ez bada ezarritako epean aurkezten, dirulaguntza itzultzeko eskatuko da, eta 5/2005 Foru Arauaren 37. artikuluan eta hurrengoetan ezarritako gainerako erantzukizunak ere eskatuko dira.

### **40. oinarria. — *Baldintzak aldatzea***

1. Pertsona edo erakunde onuradunak jakinarazi beharko du dirulaguntza ematean aintzat hartu ziren edozein inguruabar objektibo zein subjektiboren gaineko gertatu diren aldaketa guztiak.
2. Pertsona edo erakunde onuradunak, bidezkoketa egiterakoan, azaltzen badu dirulaguntza emateko kontuan izan diren baldintzetan aldaketaren bat gertatu dela eta horrek ebazpena aldatzea ekar lezakeela, 38.6 oinarrian araututakoarekin bat etorritik, hura onetsi aurretik egin beharreko administrazio baimeneko izapidea bete gabe, dirulaguntzak ematen dituen organoak aurkeztu den bidezkoketa onartuko du, beti ere beste pertsonen eskubideak urratzen ez ba ditu; horrek, ordea, ez du pertsona edo erakunde onuraduna salbuetsiko 5/2005 Foru Arauaren arabera dagozkion zehapenetatik.





## 4. ATALA

**DIRULAGUNTZAK ITZULTZEA ETA ARAU HAUSTE ADMINISTRATIBOAK****41. oinarria. — Dirulaguntza erakunde onuradunak berak itzultzea**

1. Borondatezko itzulketa da onuradunak Administrazioaren inolako alde zuzeneko errekerimendurik gabe egiten duena.
2. Borondatezko itzulketa egiten denean, Administrazioak dagozkion berandutze-interesak kalkulatu behar ditu, 5/2005 Foru Arauaren 34. artikuluan ezarritakoaren arabera eta onuradunak itzulketa benetan egin duen unera arte.
3. Onuradunak berak eskatuta dirulaguntza itzultzeko bidaliko zaion ordainketa-gutuna erabili behar da, Bizkaiko Foru Aldundiaren eredu ofizialaren arabera.

**42. oinarria. — Ez betetzeak**

Foru dekretu honetan nahiz aplika daitezkeen bestelako arauetan ezarri diren baldintzak zein, kasuan kasukoa, ebazpenean ezartzen direnak betetzen ez badira, jasotako zenbatekoak itzuli egin behar dira; baita, kasuan kasukoa, kopuru horien interesak ere. Halaxe adierazten baita 5/2005 Foru Arauaren II eta IV tituluetan, dagozkion legezko ekintzen eta zehapenen kalterik gabe. Aipatutako zenbatekoak, diru-sarrera publikotzat hartuko dira ondorio guztietarako.

**43. oinarria. — Ez betetzeak mailakatzeko irizpideak**

1. Beste dirulaguntza batzuk ere jaso, eta gain-finantzazioa gertatuko balitz, gehiegizko diru-kopurua itzuli behar du, halaxe ezartzen baita 5/2005 Foru Arauaren 18.3 artikuluan. Kopuru horri, gainera, dagozkion berandutza-interesa aplikatuko zaio.
2. Emandako dirulaguntzaren zenbatekoa eskatzaileak aurkeztutako aurrekontu baten gaineko ehuneko bat aplikatuta lortzen denez, behin betiko kostu osoa hasierako aurrekontua baino txikiagoa bada, honako hau itzuli behar da: hasierako aurrekontuaren gaineko ehuneko hori aplikatuta lortutako kopuruari behin betiko kostua kentzearen ondorioz finantziario publikoan sortutako soberakina.
3. Baldintzetako bat edo batzuk ez betetzeak edo epearen barruan jardueraren zati bat bakarrik egiteak (betiere, zalantza barik egiaztatzen bada onuradunak konpromisoak betetzeko asmoa duela) dirulaguntzaren zati bat bakarrik ordaintzea ekarriko du edo, hala badagokio, dirulaguntzaren zati bat itzuli behar izatea. Itzulketa hori kalkulatzeko, jarduera osotik hartutako zatiaren proportzio bera erabiliko da.
4. BEAZ, S.A.U., sozietateari badagokio funtsak banatzea eta justifikatutako gastua aurrekontuko gastua baino txikiagoa izateagatik itzultzeko espediente bat ebatzi bada, ebazpen hori erakunde laguntzaileari jakinaraziko zaio, sobera geratutako funtsak itzul ditzan. Kasu horretan, ez da interesik aplikatuko.
5. Administrazioak eginiko egiaztapen edo finantza-kontrol baten ondorioz ikusten bada eginiko gastuetako batzuk edo guztiak ordaindu gabe daudela eta hartzekodunek eskatzeko eskubidea dutela, itzulketa eskatuko da, proportzionaltasun- printzipioa aplikatuta. Kasu horretan, dirulaguntza jaso dezaketeko egotzitako gastu guztietatik ordaindu gabeko gastuek osatzen duten proportzioaren arabera izango da diru- laguntzaren itzulketa.

**44. oinarria. — Zehapen-prozedura**

1. 5/2005 Foru Arauaren IV. tituluan ezarritakoa bete behar du.
2. 39/2015 Legean ezarritakoari jarraituko zaio, bai eta Euskal Autonomia Erkidegoko Herri Administrazioen zigortzeko ahalmenari buruzko otsailaren 20ko 2/1998 Legean xedatutakoari ere, aurrekoari aurka egiten ez dionean.